

04 APR 2002

Mahathir-Nilai/I

DR MAHATHIR BIDAS NILAI BARAT YANG MENGAKIBAT KEMUSNAHAN

PUTRAJAYA, 4 April (Bernama) -- Datuk Seri Dr Mahathir Mohamad hari ini berkata terdapat nilai-nilai barat yang telah mengakibatkan kemusnahan dahsyat di dunia dan Malaysia serta negara-negara lain berhak untuk menolak nilai-nilai seperti itu.

Perdana Menteri berkata fahaman komunisme dan sosialisme adalah antara idea barat yang kini diketepikan menyebabkan mereka yang menerima fahaman itu terkapai-kapai.

"Dan anda tahu apa yang berlaku. Anda mengetepikan idea tersebut dan mereka yang menerimanya kini mendapati kesukaran membangunkan negara kerana mereka mempunyai mentaliti subsidi, mereka tidak memahami konsep pasaran terbuka dan sebagainya," katanya.

Dr Mahathir berkata demikian semasa satu pertemuan bersama lebih kurang 20 orang wartawan antarabangsa yang membuat liputan Sesi Khas Menteri-menteri Luar Pertubuhan Persidangan Islam (ICFM) Mengenai Keganasan yang berakhir semalam.

Katanya, kini Barat mengatakan bahawa nilai baru yang dihasilkan oleh hak individu, kebebasan dan sebagainya sebagai baik.

Dr Mahathir berpendapat perkara itu sebenarnya adalah sebaliknya dan beliau memberikan contoh mengenai satu kes perbicaraan di sebuah negara barat apabila seorang lelaki dibenar membuka pawagam lucah di kawasan pinggir bandar walaupun mendapat bantahan penduduk di situ.

"Mahkamah mengatakan lelaki itu berhak membuka pawagam lucah. Bagaimana pula dengan hak penduduk yang membantah? Tetapi inilah nilai barat. Kami tidak mahu nilai barat kerana ia tidak membawa manfaat.

"Kenapa kami tidak boleh menolak nilai barat dan perlu menerimanya sebagai nilai universal dan nilai kami sebagai tidak baik?," katanya.

Dr Mahathir berkata Barat juga menganggap sistem kehakiman mereka sebagai terbaik dan paling betul dan sistem yang diamalkan di negara lain sebagai salah.

Perdana Menteri berkata: "Jika seseorang itu dibicarakan di negara ini (anda akan mengatakan) mereka (orang Asia) tidak memahami hak asasi manusia, undang-undang, walaupun jika kami mempunyai hakim yang terlatih di England menghakimi perbicaraan.

"Dan jika mereka menghukum seseorang yang anda berpendapat tidak bersalah, maka tentu anda akan berkata +inilah orang Asia, mereka tidak faham apa yang benar dan salah+."

Dr Mahathir berkata Malaysia tidak pernah mempertikai keputusan mahkamah barat sama ada seseorang itu bersalah atau tidak.

"Tetapi dengan pantas apabila anda mendapati seseorang yang anda rasa tidak bersalah, (apabila) dia didapati bersalah oleh mahkamah kami, maka ia mesti disebabkan nilai Asia, (dengan mengatakan) mahkamah tidak memahami apa yang benar dan salah," katanya.

Menjawab pertanyaan mengenai sepina yang pernah diterimanya bagi satu perbicaraan, Dr Mahathir berkata beliau telah menjawab sepina itu seperti yang dikehendaki undang-undang.

Beliau memberitahu wartawan terbabit: "Sekarang anda mengungkit perkara terperinci mengenai prosidur. Anda cuba mencari kesilapan saya, ini satu lagi nilai barat.

"Beginilah, anda mahu mencongkil supaya dapat menyerlahkan bahawa sebagai seorang pemimpin Asia, dia ini tidak boleh melakukan sesuatu yang betul, dia seharusnya bodoh dan tidak memahami undang-undang. Inilah nilai

barat."

Sebaliknya, apa yang Barat lakukan semuanya diandaikan sebagai betul, katanya.

"Arthur Andersen dan Enron semuanya baik, anda tidak mempertikaikannya," katanya merujuk kepada skandal yang melibatkan salah satu kes muflis terbesar di Amerika Syarikat baru-baru.

Dr Mahathir berkata Malaysia dituduh mengamalkan kronisme dan ia tidak adil atau tidak memahami keadilan.

"Itu andaian anda. Itu sebabnya kami tidak mahu Australia atau New Zealand menyertai Asean kerana mereka mempunyai nilai Eropah di mana anda akan mengandaikan bahawa apa yang anda lakukan sebagai betul dan kami salah. Tetapi boleh jadi juga kami yang betul dan anda yang salah," tambahnya.

-- BERNAMA

MAM ZS MOZ